

## 1501 Der Calanda-Wolf.

Liebi Drittklässler,

Scho lang isch es her, dass mir eus gseh händ. Ich muess euch säge, ich humple immer no a de Stöck ume, wie s letschi Mal wo ich no hinte im Eggeli bim Klavier in eurere Klass gsässe bi. Und ich werde au no länger nöd zu euch is Schuelzimmer dörfe cho. Einersits weg em Corona-Virus und andersits, will ich am 20. Mai operiert werde und mir s kaputti Hüftglenk usegnah und derfür es neus us Stahl inegsetzt wird. Denn gahts no ca. 4 Wuche mit Stöck wyter und öppe 6 Wuche nach der Operation, also zirka Afang Juli, sött ich wohl ohni Krücke chönne laufe. Drum freu ich mich au riesig, nach fascht eme Jahr endlich wieder chönne Velotoure mache und go walke. Aber denn chöme ja scho wieder euri lange Summerferie und ihr stieget denn uf i die 4. Klass. Mein Gott, ihr werdet ja schneller älter als ich!

So gaht`s mir jetzt halt wie em alte Calanda-Wolf. Ich würdi au gern mit euch im Klassezimmer sitze und mit euch lache und hälfe euch wichtigi Sache z lehre. Aber ihr händ ja en liebi und super gueti Lehrerin, d Frau Kummer.

Aber zrugg zum alte Wolf: Ihr wüset natürlich nöd wer der Calanda-Wolf isch? Dir loset natürlich no nöd so gern Nachrichte im Radio oder lueget d Tagesschau. Denn verzell ich euch halt churz d Gschicht vom Calanda-Wolf.



Das isch er, der Calanda-Wolf, uf dem Bild. Er isch alt, sehr alt, ebe öppe wie ich. Au sis Hüftglenk het ihm i der letschte Zyt Schmerzere bereitet. Er het sis Wolfs-Rudel sehr gern gha, aber er het ihne, wenn sie am lerne gsi sy wie Wölf düend jage, oder s Wild a schliche, fascht

nümme nache möge. Die junge, chline Wölf sind halt sehr wild gsi, händ welle umeränne und schpiele. Der alti Wolf het das nümme chönne. Und im Gägesatz zu mir, het er niemer gha wo ihm es neus Hüftglenk het welle ine operiere.

Aber d Wölf hend ja no en Wolfsmuetter gha. Das isch en super gueti Lehrerin gsi für alles wo die junge Wölf no händ müesse lehre. Sie het ja der alte Wolf guet kennt und das wo er gwüsst het scho lang au im Chopf gha. Sie het en grossi Erfahrig gha und isch super nett und lieb gsi zu de junge Wölf.

Das Wolfsrudel het i der Nöchi vo Chur i de Calanda-Berge glebt. Ihr chönnt wenn ihr wänd emol uf der Charte luege, wo das isch. Und ihr chönd euch jetzt au frage, öb ächt d Mensche nöd dem alte Wolf hätte chönne au es neus Hüftglenk ine operiere, wie mir. Vieli Tierärzcht mache das für d Hünd. Aber d Men-

sche rund um die Calanda-Berge sind nöd e so guet z Sprache gsi uf das Wolfsrudel. Denn Wölf frässe mängisch, wenn s keis Reh oder keini Hirsch oder Hase chönd risse und frässe, au öppe es Schaf vo der Weid vo eme Puur. Und der alti Wolf isch au gseh worde, wo er innere Schafherde es Schaf grisse, tötet und weggschleppt het, damit die junge Wölf und ihri Mütterere au Nahrig gha händ wenn s Hunger gha händ. Und drum händ die Mensche halt der alti Wolf sogar welle fange und ischperre oder sogar töte!

Ich bin froh, dass ich weder es Schaff gschtöhle, no eis ufgfrässe ha. Drum han ich s Glück, dass me mir es neus Hüftglenk ine setzt und ich denn hoffentlich bald wieder bi euch chann sy und wieder laufe und Velo fahre wie vorher.

Aber Langzyt han ich nach euch, wie de alti Wolf! Es fehlt mir sehr, euches Lache und mängisch au Umetöbe vermisse z`müesse, no für es Zytli.

Ich wünsch euch en super guete Schuelafang, wieder im Klassezimmer.

Eure Klasse-Grossvater

Heinz Hodel.